

21/08/1999

`Salah jika alibi pembela tidak disah'

KUALA LUMPUR, Jumaat - Hakim Mahkamah Tinggi, Datuk Ariffin Jaka berkata berdasarkan kepada pemerhatiannya, kes pendakwa terhadap Datuk Seri Anwar Ibrahim dan Sukma Darmawan Sasmitaat Madja, akan gagal jika pendakwa memilih tidak mengesahkan alibi pembela.

Katanya, adalah salah jika pendakwa memilih tidak mengesahkan alibi pembela yang saksi pendakwa menyatakan kesediaan untuk menyiasat.

Beliau berkata: "Hasil pemerhatian mahkamah bahawa jika rekod (pergerakan Anwar) tidak bererti satu pengesahan, itu terpulang pada pendakwa dan ia akan menguntungkan pihak pembela."

"Malahan, jika (mahkamah) menerima alibi itu, habislah mereka (pihak pendakwa)," katanya.

Sehubungan itu, beliau memerintahkan Senior Asisten Komisioner I Musa Hassan menyambung keterangannya dalam soal balas selepas peguam bela Anwar, Karpal Singh bersetuju menerima "pemerhatian" hakim berkenaan.

Pagi semalam, Karpal, yang menyoal balas Musa, memohon perbicaraan itu ditangguhkan bagi membolehkan Musa menyiasat kebenaran alibi pembela selepas Musa menyatakan kesediaannya untuk berbuat demikian. Perbicaraan itu kemudian ditangguhkan hingga jam 2.30 petang.

Selepas mahkamah menyambung semula perbicaraan pada petangnya, Peguam Negara Tan Sri Mohtar Abdullah, memberitahu mahkamah bahawa beliau menasihati Musa supaya tidak menjalankan penyiasatan itu kerana pendakwa mempunyai rekod mengenai pergerakan Anwar antara 1992 dan September 1998.

Karpal kemudian memohon kes itu ditangguhkan kepada hari ini dengan menyatakan beliau memerlukan masa untuk mengemukakan rujukan bagi menyokong permohonannya.

Bagaimanapun, pagi ini, peguam itu tidak mengemukakan sebarang rujukan. Sebaliknya, beliau meminta Ariffin memutuskan sama ada Musa telah "mengingkari janjinya yang dibuat dalam keadaan bersumpah, semalam", apabila enggan meneruskan penyiasatan.

"Bagi seseorang yang memujuk saksi ini daripada berbuat sebaliknya adalah satu pelanggaran dan mencemarkan pentadbiran keadilan," katanya.

Karpal berkata demikian bagi merujuk kepada Mohtar yang menasihati Musa.

Mohtar yang membantah sindiran Karpal, berkata pendakwa mempunyai semua rekod pergerakan Anwar dan ia adalah mencukupi untuk membalas hujah pembela.

Ariffin berkata: "Jika pegawai penyiasat tidak mengesahkannya, jadi alibi anda (Karpal) adalah baik. Saya fikir kita teruskan dengan pemeriksaan balas."

Musa yang menyambung keterangannya hari ini memberitahu mahkamah, beliau tidak tahu Azizan melaporkan perkara itu (diliwat Anwar) kepada Perdana Menteri.

Katanya, beliau hanya tahu mengenainya daripada laporan akhbar yang dibacanya tahun lalu.

Bagaimanapun, selepas menjalankan penyiasatan terhadap dakwaan itu, beliau mendapati Azizan juga menghantar perisytiharan bersumpah kepada Perdana Menteri berhubung perkara itu.

Menurutnya, tidak pernah terlintas difikirannya untuk bertanyakan Azizan kenapa beliau pergi berjumpa Perdana Menteri, dan menyatakan bahawa kenyataan Azizan yang beliau rekodkan sebanyak dua kali, tidak menyebut sama sekali mengenai perjumpaan itu.

Kepada soalan sama ada sebarang kenyataan diambil daripada Dr Mahathir Mohamad, Musa berkata beliau tidak tahu.

Bagaimanapun, beliau bersetuju dengan Karpal biasanya kenyataan akan direkodkan daripada seseorang yang namanya disebut oleh saksi utama seperti Azizan.

Karpal: Dalam kes ini adakah sebarang kenyataan diambil daripada Perdana Menteri.

Musa: Saya tidak tahu.

Musa mengaku bahawa beliau telah membaca laporan akhbar yang memetik Dr Mahathir sebagai berkata bahawa beliau (Dr Mahathir) menemui saksi-saksi tertentu berhubung dakwaan itu.

Karpal: Adakah Perdana Menteri ditemubual atau adakah satu kenyataan direkodkan daripada beliau?

Musa: Tidak.

Musa berkata, beliau juga tidak tahu sama ada Azizan pergi berjumpa Perdana Menteri terlebih dulu (mengenai perkara itu) sebelum pergi kepada polis.

Beliau bersetuju dengan Karpal bahawa biasanya, dalam kes kesalahan seksual, aduan pertama yang dibuat kepada sesiapa saja adalah penting terhadap kes itu.

Musa berkata bahawa sepanjang penyiasatannya itu, Azizan tidak pernah menyebut nama Datuk Megat Junid Megat Ayub kepada beliau. (Megat Junid ialah Menteri Perdagangan Dalam Negeri dan Hal Ehwat Pengguna).

Karpal: Isteri keduanya, Ziela (Norzila Jalil), seorang pelakon, adakah namanya disebut oleh Azizan?

Musa: "Bukan oleh Azizan. Kenyataan Ziela diambil oleh polis untuk kes lain.

Kepada soalan lain Karpal, Musa berkata walaupun beliau tahu bahawa Tan Sri Rahim Noor, bekas Ketua Polis Negara, membuat kenyataan media berhubung kes itu tetapi beliau tidak tahu atas asas apa ia dibuat.

Rahim, katanya, tidak pernah terbabit dalam penyiasatan kes itu.

Ketika diperiksa semula oleh Timbalan Kanan Pendakwaraya Abdul Gani Patail, Musa bersetuju bahawa laporan media yang memetik Dr Mahathir sebagai berkata bahawa "tuduhan terhadap Anwar adalah satu cubaan untuk mensabotaj beliau (Anwar)..." adalah berdasarkan satu laporan yang dikemukakan kepada Perdana Menteri oleh Cawangan Khas dan bukan daripada penyiasatan yang dibuat selepas itu.

(END)